

四庫全書

集部

欽定四庫全書

集部

西河集卷一百八十八至
九十九

詳校官編修臣曹城

助教臣常循覆勘

總校官庶吉士臣倉聖脉

校對官編修臣馬啟泰

謄錄監生臣姜也魯

欽定四庫全書

西河集卷一百八十八

翰林院檢討毛奇齡撰

五言格詩四

讀史詩二首

張生本文儒夜起受簡編忽從游俠行破產思報韓志
意久不達物鬱何由宣一朝風雲生帷幄進讜言持籌
并握箸所至無拘掟當其家居時游戲商洛間平交結

者舊偉製裁衣冠辟穀散暮氣斲芝當晨餐貧賤可肆
志富貴難久安寧負平勃交勿棄園綺歡遐哉赤松遊
豈為求神仙

二

蘭成烟霞姿倜儻超等倫少小作抄撰落筆如散銀並
使嚼鸚鵡同等摩麒麟池臺紹河曲鐘鼓宴洛濱太平
三十載總是梁朝人豈知蒼鵝飛頓令玉馬湮朱桁撤
單舶青袍蔽長津庶望下亭旅重邁南郡春如何走秦

關別館留孤臣三戶既已盡七葉誰見親從此東海鳥
長作西都賓陽春方遞代去故當就新寒暑有時盡日
月無返晨臨都哭三晝繞屋步百巡豈不被顯爵亦既
叨殊恩無如慕鄉井惠好難重陳生逢亂離世老作異
代身江南草長時回望情彌殷枳橘豈秦產夷齊本高
民一吟思歸辭淚下霑衣巾

重葺湯太守祠有感兼贈李使君

先哲有遺澤所重在廟祀沉能利是不止悅從事緬

想前代賢大者闡理義細亦克樹績樽俎列為例夫君
親裸薦每祀致精意稽神戀管蕭假廟葺頽廢伊昔漢
太守不以一錢繫近且開泐門恩共海濤凜感激拜祠
宇前後治無二以之祝金石取壽在世世

張荀仲先生七十壽詩

紫蟠斂朝日丹花拒秋霜攝提貞元英稽士以滌場良
月邁皇覽弧矢方重張前庭羅嘉賓中饋陳酒漿君子
登高躅避地羈遐方書通獲玄祕道蘊流詞章軼步周

五嶽顥氣蓋四荒華首還班麀娛景時相羊伊昔介胡
考設醴遇石陽官亭致繾綣歷歲同杖鄉于今憇丘園
子姓繁趨蹌白魚跳澄潭潭水何滄浪賤子託末契登
堂進霞觴微辭播芳徽景止安可忘

題趙千里右軍書扇圖為郡丞王君

右軍本瀟灑卓筆起烟霧曾念貧嫗飢為寫蜀紈素畫
子趙伯駒畫作秦宮人銜毫灑鸞羽意亦超等倫王君
妙書法乃在右軍上健臂書榜闌往往過尋丈丈筆作

大書堆紙亦大餘頃刻文紙盡滿地堆明珠去秋涼風
時古署看落筆兩目不及瞬宛如飛鳥疾一童伸紙來
一童抽紙去但見紙背翻不知頽頭住我今題右軍愈
思王君神終朝書扇去不解是何人

淮上送白孝廉歸白門

我愛白夫子遨遊迴凡俗信友兼順親嘗著老萊服宿
昔飲耶水春山映紅旭今我逢淮山水蘸夏荷綠與之
拜漂母彈絲并擊筑忽言念高堂躊躇亂心曲解纜趁

暮潮持罇出晴郭重茵對沙坳列坐倒醴醪人生各有
親戚戚怨行役如何送歸舟護花滿江麓

題張七維隱躬耕圖

涉世不得意因思種南山惟恐志莫訓置之圖畫間野
圩青禾滿高樹碧藟攀所畏秋風生慙慙凋令顏我亦
厭車轍有懷在河干耦耕倘相期與子荷鋤還

陳法曹妓席觀藝蘭作

種草不擇葉所重在其花何況藝蘭者會鼓將傳芭古

人貴紉佩比之雙珩牙迤邐幽谷間停車每咨嗟今者
啓閭園平地填玉砂白跗折夏筍紫莖翳朝霞或云淮
南說男寡蒔不佳所恃美爪指炫服相勾爬小固富苞
甲大即盤根芽春風汎高光翩若嫵與媠君今列長筵
襟坐皆吳娃前庭貯芳馨後苑颺綺紗我本深林人失
足投繁華行將採幽蘭予以贈遠遐

商太傅新宅作

休暇達城邑言稅太傅堂太傅有別宅緣城溯滄浪小

入即遷坐暫復驚遠方層庭挾幽芬敞楹延空光歌臺
綴朱網花洞連曲房通川截帷帘圍橋接闌塘湔裙褚
浮鯉濯粉堊去航夾石委波淺方陂貯雲涼鑑飛暮天
烏幔捲春城桑童觀雜賓對酒榼承麩牀酬勸藉絲管
歌詠成篇章洛中景前模恍惚光宅坊

從商太傅宅左巷問伎裁疑扉間以迎亟折屨
同行者詠古詩四句嘲之因索予補綴數韻
以代紀事遂倩婦粉幃捉筆成篇

東山舊攜妓，總帷留空絃。獨有東家姝，不住松柏前。自
矜阿侯小，豈羨羅敷賢。援箏惜爪脆，吞卵憂脣纖。左閣
佳客邀後園，小婢延抽衣。起恐遲局步，迎當先花路。細
蘚滑畫屨，高牆淹腰鞵。翠櫺落趾弱，朱底牽新羅。繡行
纏足趺，如春妍。他人不言好，我獨知可憐。

留別四首

我昔挾弧矢，驅馳桓東場。伊維多少年，聯翩共翱翔。名
材極吳楚，竹箭延三邦。縱橫斥海內，驕蹇莫與當。號呼

震原埜所向無侯王高會置廣宴浩蕩稽山陽四顧失
渺小長嘯進樂方朝餐金羽卮暮宿華鐙光四時相代
序遞釋溫與涼劇飲還自娛歡樂誠久長

二

少壯遠行役置身車馬塵挾瑟投上都殷勤向齊門於
時啓長馭高駕為紛綸朝登岱山陽暮出河水賓倉卒
辭道里軫念惟故人玄冬涉冰雪亦復回陽春時物展
徂謝夙昔猶見新流滯無遠大纖屑以寵珍外覽總濶

達內紆難重申迴鑣策坡陀顧盼徒逡巡
轅駒恐踰躓何以慰我身

三

窮冬抑悲懷方春動遐思遊子當困窮亦以專所之涼
風起前庭落月垂軒墀秣馬展車輻出門造天涯白日
無停軌流水無止期相將辭所好撲拙遲言辭長劍遊
八荒麾斥窮四陸晞髮崑崙顛躅足流沙隈前塗方起
駕風伯為我追努力事攬轡感感毋相違

四

涼風吹高旌逡巡轉悠遐我今適他方塗路仍已賒出
門雖寡媚四海還為家結交本新豐故舊欣有加百步
一回顧不見門扉朽我行況廣遠河水牽浮槎情盼雖
不隔羽翼終見遮努力事餐飯汎景隨時嘉要汝以古
期石室藏頗奢行將登龍門呼吸餐朱霞

潁州道中謝野人獻菊有作

晨發潁州路朝光啓城闈修塗接林端遙見菊蕊新微

霜抽寒馥宿露滋清神駐馬一迴盼駕言踰前津野人
折相贈頓使幽意親菜苞含紫貝琢玉規芳鱗佳色滿
纒縞流芬藉衣巾故園有遺侶高興發上辰東籬坐相
待西苑歸何因餐英解頷頤釀酒酬苦辛睠言謝修塗
雅意長相伸

贈徐徵君三首

滔滔黃河流中有天門高巍然一孤柱砥此千里濤雲
物互回合魚龍亦相朝豈無波中石礮磊隨沙坳

二

曄曄山上芝
熠熠開朝曦
朝曦一何爛
丹芝一何絢
伊昔商山翁
垂老採蕙禧
豈無春花榮
芝草宜晚見

三

澤豹亦已隱
吾獨誇熊羆
太公年七十
鼓刀去河湄
豈無盛年子
游仕如散宜
歸載方未遙
居海以待之

和汪柯庭哭子詩

團團青荷珠
恨在掌中碎
難膏結蓓蕾
翦剔轉顛顛
汪

家有奇兒阿閏年五歲

名兆熙小名阿閏

白雪洗弱顏香羅裹

了髻炯目駢澹冲摩頂驗寶誌孝能把黃扇智足守鄧

藝驟當秋霜飛庭蘭忽遭刈臂環探有在衣篋封未既

鳳羽尚集肩虎魄已墮地瓦棺帶枿掩紙轎共藤瘞聞

其理玉坡喚作養鴨滙

桐鄉地名

千秋亭一名十日舟再至

延陵每號呼子夏但流涕伊昔喪亂日東南正鼎沸載

車亦安往藏褲並無計新婚嚮明別天殯中道棄況當

避仇出家室總淪廢丁年走安丘垂老喪越騎天道真

未明人間此何世君家茂神光竒骨應再繼比之瓊樹
花一落一開替東門無前憂西竺有來意人生若輓轡
聚散等升濟莫言太上亡情鍾在我輩逋翁既苦吟烏
子亦哀祭香囊果無忘前身豈難記

龍文篇祝嚴司農壽并貽其大令侍御

鳳翮簸海出龍文鬱雲翔君子秉令儀特達成珪璋弱
齡弄柔翰矯矯升詞場國士傲管樂才子傾裴王中途
騁軼足千里駕驕驕一出登承明再出侍建章以次躋

榮列廣宿羅文昌當其隆獻替腰組縣諫囊暨乎蒞臺
端冽冽懷風霜雖復歷華要數歲週巖廊從容副司元
國計歸少常夙昔侍文賦曾載西園觴為陪濬沖談每
登御史牀玄冬會皇覽甲子迴青蒼練日賓以集迎春
物能芳曩者嚴夫子解牴投滄浪出處雖異致千載同
馨香我將贈微言道大難敷揚庶幾景風徽山水高且
長

贈王生閬齋詩

有序

唐王績古詩云朝棲閭崑木言鳳也王生所居若卑
瑣而意致深遠較之鳳五采備矣且遙曲通光時有
爽朗意題曰閭兼贈以詩

崑丘有閭木嘗以棲鳳凰我今羨王生結廬在市傍初
入思窅窅坐久神飛揚譬之珠樹巔六翮苞采章覽輝
德彌下處晦道愈光有時發清談鳥鳴在高岡

擬游仙詩二首為駱貞母俞夫人作

我我山上松矯矯雲中鸞鸞羽將鳳雛松枝何團團昔

我登玉笥遙望明星寒明星在西方寄我玉藥丸駕言
丹丘兒鍊藥燒琅玕一朝想丹砂忼慨前之官蓮花為
緋衣石頂為金冠修成上玉女拂拭雲臺端聞之華山
曲二八桃花顏中塗杖老翁謂棄黃金丹高天把沆瀣
將以同所餐華池鬱金光千載長相歡

二

朝吸青城霜夕繪紫海魚鴻濛一萬里白母來徐徐中
宵八公駕外戶雙成琚茅龍當前旌石虎迴左車釣天

有瓊藥用以標清虛紫冥聊服食下土安所儲瑤臺本
金精緱氏凌玉除從容嚙肺腑百歲良有餘碌碌笑周
滿竊讀層城書春山驟駮耳倒載空璫璣黃眉既昇行
有母存居諸女貞樹三山五采將何如

大敬生日和南士作

林深木彌茂源濬流愈長君子秉令器斐然方成章嘉
言被遐服飭行居舊邦豹變具文質龍神解行藏暮類
思鳥鳴逐惡如隼揚容衆謬予及親仁敢君忘曲枿綴

鳥枝卑丘倚崇岡兄以十年長師乃一日良昏昕共涼
曝茶旨分吐嘗荏苒歲序移儵忽冬春翔鮮蔬映牕綠
弱羽翻壠黃嘉名錫揆覽服政惑救鄉遽將寡譽悔陶
始歸畎疆前徽豈難追上齒總未央道大德彌幼日暮
途方長願觀中天曦藉爾四壁光

楊母九十壽

宮宮東廂桐下有青瓊枝有母秉懿德鬱若鸞鳳姿君
子夙砥行藝苑垂風規趨庭善繼志早歲能紉衣筮仕

出麟府閒堂坐彈絲中間分虎節遠在汾水涯板輿
難將養邨疏未期菽水代榮祿歸來戀庭闈下壽躋上
壽星會三週馳依結兩不釋子孝母正慈今當捧瑤爵
于焉慶期願明星在中天百歲總不移

曹伯母壽

曹侍讀同年
母太君也

人生最堪樂高堂有賢親況當享修年八十方賜珍所
慮版輿隔西舍留逡巡而乃拓養堂右與金闕隣服獻
絲監織繪上山池鱗拜母有王導對客饒長文我亦捧

五豆將遂攀千春俯首誦母德倍覺汗簡新當其前荷
蕙慷慨辭靈均啣顰養孤雛忠孝兩得伸白日漫揮戟
滄海徒揚塵松柏在巔峩豈與衆草倫

題畫石贈友人南游作

丈人嶽嶽姿意氣本磊落高峙泰華巔浮雲翳長薄所
以謝幼輿宜置丘與壑涉世鮮塵坌孤懷頗岵嶸比之
他山攻往往藉礪錯項將訪昆吾南游望寥廓好友贈
斯圖其意亦有託舉世皆脂韋何如守堅確想其下筆

時相視起盤礴

金少司馬開府八閩索書幃子

曩者張尚書帝命作安撫豈不戀朝宁憲邦在文武所以名相業往往重開府袋帶賜尚方瓊林宴罇俎今公本司馬出鎮東南疆山澤甫聞訊海波為不揚

天子顧安攘重念此一方龍圖乃長城虎池如金湯以茲錫弓矢兼賚旗與常方今啟王會萬國來梯航况爾閩海間侯衛非要荒笳吹發國門旄鉞分顏行南溟

與東越從此奏又康八州蒞蕃衆三公肇當陽何如下
東甌大座威武堂

三竺步禱詩

為陳中丞作

盛世鮮六事惠政裕三澤如何沴天行往往遘膜嚇閭
闔播時藩歲下三百六偶然當警陽所懼在恒燠不爭
焚如熾念此忝與稷燒巫不能感暴瘡非所欲惟是湖
上山最峻曰天竺上養佛母慈判身自西域清泉濯楊
枝甘露釀筍竹中丞抱躬喝十日起齋宿出城十餘里

躑躅走山麓由是躋雲椒彷彿覩天目跣足却羽麾炙
背棄車樁穿林蔭清幙借汁澣暑服從來禱郊壇響應
藉工祝山農洗泥牛巷婦浸土蜴何如御史雨所至即
霑足不煩翦爪髮但爾煖鷄鎗束生謠自來魏后著可
卜仁人惠澤多斲石不勝錄即此步禱詩千秋詠芳躅

贈別詩

嚴城薄短景十月苦早寒清宵風露下游子衣裳單良
遊鮮得意嘉覲遺軫歡逝將去江渚駕言投晨餐日出

館隙光水駛河流湍脫木畏緒颺驚鳥疑空彈市圯納
敵履解馬束壞繁徒懷負暄炙苦憶培風搏推聲詎無
繇弭節良獨難開械乏錦段折竹虛琅玕游心仰天雲
餘問承海瀾朝看行車馳夕視飛鳥還

姜京兆自奉天請養歸里送之潞河有作

結綬出中固抵治蒲河陰慈母在高堂嚙指長痛心于
今忽二載霜雪時相侵官居穴土蟲戍窖藏山葭不知
八廂冗但覺三衛深

詔書下褒美將以施鉅任如何驟懷歸車騎徒駸駸憶
昔別故里出祖胥江潯中間予被

召書閣隨向歆每思邊趙入對闕同開襟而乃詠白華
先我返舊林

聖明首教孝子養時所欽烹魚割紅玉租橘堆黃金況

當進舞者花甲方重尋

時京兆
六十

春山驅騾耳萬里忘嶮

嶮我有一罇酒碧露芳沉沉既為修塗醜且作永歲斟
薰風起通路高柳棲鳴禽思歸不能隨雙淚如雨淋他

時罷筆札慷慨還抽簪待君來承明更作海客吟

古詩

噉噉孤鴛鴦啜喋清漣漪文藻縈外澤幽花蔽中池單
情獨噉噉戢翼還求雌相視寡偕偶所至恒乖離雄鳩
善姚佚嘯啗嘗見疑祇為錦繡張坐使羅網羈賦性本
良媵與世無乖違修容蓄文彩還為匹者施懷儔不能
侶至死猶相思如何惓惓尤惻惻來嘆咨

二

欄隙朝星移幃踈曉風坼怨女歸曲房一顧三嘆息塔
藥彫絳衣山藍壞芳色曙影涵鏡光問誰理容飾東園
有狂夫中路懷匪測張羅近烏邊懷金匿桑側思以輸
樂歡因之叙儔匹豈知我有夫道遠義不隔井深念絲
長絃斷知矢急與子堅遠心高河展疇昔

賦得前山手可數

層峯列平疇曲嶼聯高岡空庭敞菱莪長貯雲日光林
扉逼欄啟石繖當門張縮螺儼堆髻眠磧同卧羊有時

射晴旭霧散無遮藏宛若書竿子纍纍紛在牀巨靈擘蓮華丁士吹劍銑懷抱苟可通何用長褰裳晨興撫家珍指計方未央

為姪孫友桐題伏生授經圖卷子

伊昔秦火後典誥無完編所賴伏博士藏壁廿九篇斯時無孔書百兩數未全先以此廿九教書齊魯間其奈口授多禱之齊人言兼失舊章句誥促誰與傳以故太子令奉詔來牀前再拜請授業展卷捧几筵博士九十

餘齒落聲暗然有女本姣小代為傳與宣經從數嫌接
字以脂香連義訓并屬讀由此無闕焉生平景芳躅長
望空淪漣何期虎頭筆繪入鷺溪邊白石有時爛高松
有時刊惟是傳經圖皎皎千百年

西河集卷一百八十八

欽定四庫全書

西河集卷一百八十九

翰林院檢討毛奇齡撰

五言格詩_五

重汎宮亭湖效劉楨體奉貽周副使三首

汎汎宮亭湖沿洄出彭蠡山川互盤紆雲霞散成綺念
君蓬瀛姿滄波浩無紀豈無鴻濛期流濫自茲始

二

蒼鷗翔湖濱不與湖雁羣徘徊下洲渚藻荇相續紛方
其睇滄流豈不念青雲摩天厲秋節喑啞非所聞

三

熒熒陵上苔濯濯丘中樹苔花豈無姿纍纍且縈佇陵
苔亦有姿樛木亦有枝願言保層柯眷此織蔓施

周括州南昌寓亭贈瞿生

括蒼賢太守有友名瞿矧相將泛海嶠掇食瑤華英春
風拂行旂秋水揚歸舲竭來度五嶺邁我南昌城太守

指之言是將饗豐齡百歲方半逮一采穀石成方還平
原里高眺雲間星與之佇匡廬延此天半青

於臨川江上灘作

杪秋迴迅商戚戚沂江湍江水激如箭挽舟上重灘深
淺清見底宛然還新安粼粼水中石可以滌眇歡修林
蔽圻岸零霧相鬱盤零解霧亦歛傾景浮清瀾短候苦
修涉佳盼良亦難況兼凜飈落陰蟬徹鳴寒瘁葉愛華
菁枯流恣潺湲疇謂南中榮我獨懷瘴殘寓物未更素

中志隨節闌誰當假寒葭日以蕙與蘭

詠史

良夜不能寐起視星辰稀四顧何蕭條孤雁當南飛寒
輝耀層林團露野草腓俯首思古人兩志胡相違柳惠
事汙君三黜為世譏周武稱聖明西林採其薇

二

四海既混一六國咸歸秦不虞漢代儒猶自著美新草
澤甫竊發郡國先埃塵三川既淪亡軹道寃不伸人生

有義分各自為主臣季布哭項羽王蠋悲齊湣烏鵲自
有侶毛髮亦有倫不觀山谷間尚有秦遺民

施湖西白鷺洲講席贈蕭孟昉

清霜肅羣木麗景迴芳洲開軒抽衆奧講藝延八丘揚
鑣輯遐土抗旌逐良游先哲久云逝紹聖良獨憂湖西
早毓德尚席來躬修賢智效麇發激爽同川流璠璣既
奠陳笙磬將考求徒然昭俎實誰與羅饌羞彼美起仔
負秩秩揚牲卣執經數千人驩讌咸孔周澄波挹源會

叩鐸祛紛糾晨暮獲芳訊擬議開爰諏遂令鷺渚側絕
勝鹿洞幽西江有謚學了了無前儔宣城嗣徽躅大義
恣討蒐吾鄉連舜水湖泳靡自繇遷延奉筵几臬兀若
贅瘡緬彼素心士方合兼志侷發憤獨勩受豈不成干
秋鴻筵罕時覲嘉會難再酌投分託謠詠聊以播令猶

酬別徐二十二嗣定原韻

熙颺迴寒原零雨載修塗西游阻長薄逝將復改徂振
策厲隰草抽纓結江蒲山川浩茫茫念子情鬱紆迢遙

故鄉陌各以貧賤驅殊方幸連軌登陟延須臾如何又
越服惻惻臨路隅程生怒征縣孫子嘆遷衢行雖異豕
鹿往與涕泗俱嗟君千尋姿譽我徑寸株垂天茂文羽
謬許同鷓鷁何當把腹毳附汝南溟圖層柯蔭崇岡覆
此下土荼

平年伯壽詩

泰山何盤盤海水何湯湯鳳凰棲梧桐鸞鷲鳴山岡伊
予汝南叟起家承韓疆名閥共韋許奕葉垂憲章中朝

歷南渡萃族移東揚翁本廊廟才委擇任紀綱
名邁孫幼辟事同范滂在庭嗣賢哲入室成琳
瑯陸曄見雙壁陳氏推二方迄今視鳩玉眺望
龍山陽徘徊共賓朋羅列紛酒漿祈年重古稀
鄉老尊三光況公攬德輝貽此世澤芳蓬萊接
良會水淺三為桑何如捧流霞一顧海水長

將雛篇為陳庶常母太君壽

秦稽接天姥遠在東南隅君子善養親顏色方
令愉每

云母聖善少小曾茹荼負土越三世持戶無一夫辛壬
鮮良日在襁恒呱呱難脂課完讀母口真卒瘁幸當項
領成驅騁追皇途如何對揚切翻令溫清疎今值設悅
日遠道承歡娛遙持一觴獻重以萬感俱東山有棲禽
其名曰孝烏嗷嗷反哺乳將使尾畢逋一朝翔青雲借
宿上苑株縱或報育遠敢謂羽翼孤不聞丹山凰五采
備德符產子游四海所羨能棲梧滄波正清淺山谷仍
鬱紆他時返丹林百歲猶將雛

奉贈徐春坊先輩兼祝初度一十五韻

海嶽不易生鸞龍與杞梓況秉參鉉姿出入世所倚維
昔仰蓬觀格澤曜衆美陟驚瓊玉暉君家好兄弟孰悟
金馬廬偃蹇作後起豈有白髮翁而辱青雲友乃蒙鎔
造舒謙順及庶士軒宇開上靈泰道方下濟投贈饒案
玉斟酌逮酒醴高義薄喬雲崇情式波靡餘思發文藻
挾天一何綺自昔抱圭璧瞻彼誦有斐矧當皇路清周
道正如砥君子重所生願言必攸始載詠崧高篇清風

拂蘭芷

送吳道賢南還

大雅久不作下里笑折楊
秋秋雙鳳同變作釜與甌
夫子懷儻哲特達如珪璋
氣雄闢雲海胃豁羅星房
幽情本詰曲露技鮮蓋藏
有時起吟嘯觸節成文章
劈流試劍影徹札洞箭鏑
獨是鐘律減學者昧羽商
聽聲略沙識造管用忝量
豈協朱孔絃徒厠黃門
倡君來唱樂府古調追
虞唐情文接師夔譜數
註令羊拍散有刊度契

注生豪芒鄭玄迷七均荀勗罷四廂何況元音乖但截
中指僵念君季英裔生在周侯鄉高門久擴大駿烈時
誦揚四世嬪清德五畝餘甘棠賜書簡增汗予杖衣裹
瘡諸子列上舍羣從饒中郎四游及京圻一顧誇驕驕
公卿爭逢迎流俗罕頡頏其如薑桂性所至愁羶薌以
茲幡然去有似鶴羽翔當其乘風行引吭鳴高岡倏然
返遙海仍伏芝田傍長途絕篝箴濩澤無稻梁緬此凌
霄姿一望猶倘佯

何使君歸第詩

霜鞠被平野秋蘭蔽江臯吾師本金閨攬轡渡浙橋文章布遙海意氣凌青霄五馬蒼梧行撫此棘與苗相如久馳檄馬援增銅標角巾返東第卧轍環西郊何當散珠光白日還海潮

題水閣觀蓮圖

為查又
微作

敞閣臨廣陂倚柱薰風生襟同碧梧爽氣與流水清傍江有荷花呼童鼓兩槳採之欲貽誰獨立結遐想

紀恩詩

有序

康熙二十八年二月

皇上以觀河南巡

臣竒齡

初迎之嘉興城北既而

軫念河患

躬禱禹陵十三日渡江夜雪著曙滿江口趨走不及徬徨

跪道左侍衛馳詢銜名去既則

皇上勒御馬遣侍衛馳至跪所傳

皇上問毛竒齡你病已好否對未好侍衛回奏

皇上顧之去暨十五日還渡奇齡復送之望京門外

皇上望見復勒御馬回向親問毛奇齡你病已大好否

對尙未好又

問是如何病對是雙足風痺不能站立之症又

問如何不調理對調理不能好及又

問則

天語過高艱于卑聽侍衛呼答應乃對曰小臣毫末何

足當

皇上垂問

聖恩浩大

小臣

何敢當

臣

叩首謝

恩遂首地三至訖然後控

御馬復

顧之去竊思

臣

濫叨

主知侍從七載曾無杪忽有所補裨即請急以來又及

三稔日為二豎所苦報稱無地深用抑損雖心懸

魏闕而駕戀未遂何幸

聖恩惓惓垂眷再三即大臣親切未易叨此異數么小
病廢何以得此犬馬齒雖衰欲不鞭策僵足捐糜殘
踵不得矣因為紀

恩詩一章以誌感激匪敢誦揚

聖德亦以攄小臣幸遇之私云爾

生平苦椎寒輯足東山阿何期

天門開垂老應制科

天子親試者名制科

丞相上墨業擇菜分侯

莎

至尊秉皓鑑指事斥女媧

時

上親閱予卷獨指
摘鍊石語有

御批票遂

爾官親近日侍丹樞樞橐筆紀鴻要作史慎細苛逡巡
七載還日影軌邊過中間荷

帝眷曾賜雕錦綉

瀛臺饗親臣座末猶張羅于時最堪念三省校士多即

就部宴時

宣予

殿東坡閣臣相迎言所進書蚪蚪

親攜至海淀歷歷經

聖職

天語道才士

褒詞勝温鍋

時滿中堂傳予至閣門宣上旨謂所著通韻好有才學

小臣感腸

肉老淚如逝波不幸五父殯告歸筮陂陀翁修遘風厲
三歲成巨疴迄今踞里門有鬼在膝骸徒然仰

天闕何由侍

鸞和

聖人省方俗南下特觀河愁聞沂沐濫厭聽宣房歌歛

圭向苗山埋璧祀窆窩

禹陵有窆石相傳藏衣冠處

迎

鑾樟亭東始得攀

御駟

皇恩尚垂恤駐蹕宣玉瑳平沙擁寒雪驟覺光風和

天顏咫尺間軫是何病魔拜手復稽首小臣患跛跢伊

昔授筆札日夕傍玉珂東廳抱襪被蟠戀如蜒蝸相隔

僅三稔棄置同敗蓑魏魏

萬乘尊猶認道上，
猥土芥等手足。
溫言重擲抄分單，
尙如此情深可奈何。
所喜

聖人出甘露垂青稞，
大禹所巡地夜半來神鯁。
況復麒麟生正在舜水渦，
則是一遊豫四靈紛娉娉。
豈有扶輿升不即蘇廢癩東南感。

皇澤擊壤遍稚妣，
何為卧蓬門啟口時。
呿呿

集南湖即事

揚舲出乍浦，
高會南湖濱。
春流漲前溪，
朝日吐遠津。
結

歡共遐邇慕類忘新陳臨江接輕航大道馳廣輪平居
既修逖積歲多風塵何期憇難遘兼得叙所親高筵倚
長薄妙伎聯芳茵但憎酒車緩勿愁日馭湮遲之見沒
月將欲留經旬離懷未全抒良遇當再伸嘗恐歲時邁
對客為懽忻況兼道路難避人多苦辛清明斷霜雪裹
帽如綸巾早行尙蒙頭雙鬢已若銀

秋日集城東何氏山庄

積雨散伏熱新晴動秋陽涼風接單衣亭午到草堂疏

沼澹雲影層樓翳山光分黃野禾熟帶綠江橘香蓮枯
露錦鴨桑落餐綿羊魚筍截長陂蟲繭絡敗牆佳客授
素簡主人持清觴談議得快節投擲當樂方良時有代
遞高會非尋常況丁物變衰野行多悲傷人生苦離索
逝者如滄浪好樂曾幾何蟋蟀又在牀

泛舟

泛舟來南湖日沒夜氣侵北山有明月南山尚陰陰微
風盪湖波躍躍如散金我欲看明月月在山樹隙上山

看移時滿袖畫山葉虛聞水聲動獨坐心自恐下山問
前舟露滿舟上頭

送姜黃門赴都

紫微曜層清列宿明天階興雲鬱文昌閭闔一以開君
子秉亮節振藻揚九垓託身蒞華要握筆相徘徊藻合
識魚在梧萃知鳳喙乍轉青瑣闥復入銅龍隈暫言隔
通軌遂得聯清裁敷文播朝列將以躋上台璠璵炤日
月亮能積中懷明堂貯鴻寶秘此鼎與萬祇念幽壑侶

徒抱中林材出處既已異去就臨當乖結轡凌滄洲安
能與之偕行將攀修衢與之詠康哉

答張生見詒

文鳥負翠羽揚輝集高丘東飛覓琅玕暫向洲渚遊清
河有佳士意氣凌朋儔英年發鴻譽典籍披已優作賦
類平子方略追千秋聞聲願瞻依常恐道阻修一朝整
宗駕縱轡臨荒陬相從挹言議宛與江海流明姿映寒
日高興乘清秋禪闕誦曇摩長嘯居上頭顧予贈佳什

遠勝英玉投結體近南雅敷文並商謳大道久不作盛
誼今難求殷勤諷來章聊以當沫游

雙壽詩

為徐克家
兩尊人也

高天敷崇文厚載揚丕熙膚華孰為材淑德不可儀君
子啓壽域達人為邦基流徽及中閨壽母與令妻我欲
溯自始因之風來茲南州本名胄北海垂華綏前喬鬱
根株歷植蕃溉滋加以兩無慙克大卿長軌毗厥四有
德畢潤鍾郝姿偶當元會開周此星辰馳兩紀競緯絡

二離爭融輝何用紱麟角孔庭饒青絲何用組鳳毛謝
氏多彩翹東公授文章西母貽瑤琪南箕輸酒肴北斗
吹埙篪三君羅門廡八龍侍堦墀平生稱俊及登堂拜
賢懿亦有顧厨彥髻醕工走趨我來扶玉杖玉杖修難
持更為捧珠髮珠髮煩寶璣但進難老觴誦此無疆詩

蠡城公讌詩

有序

姜侍御東游蠡城同人公讌于張春坊故宅酒半侍
御出所攜伎童三人登場變演皆殊姿妙藝相遞為

日色歌扇招風舞裙曳地坐客皆心醉如是三日徐
二十二朱三各起為倡韻屬予和詩

清風起長林高樹環深堂君子懷素心佳晤合兩鄉前
屏列丹青下坐陪綺黃進此芳筵珍間以華燭光名優
越數隊別部皆成行急管凌繁絃嘈襟踰衆常中酒出
三妓繡帕朱襖襠千盤舞皆迴四目瞪若僵倚徒玉拋
撇盼睇珠熒煌頰鮮勝鄭桃喉轉過謝楊鷄詔換鑪炭
鳴睡添衣香侍御雖見慣亦復神思揚一日館易設再

日筵改張三日衆心醉瞽瞍都猖狂古稱殊絕伎間代
始一章歌有絳子駒舞乃公孫娘今茲盛繁會曠隣羅
百昌良辰邁神觀過此安可忘兔園集時彥驄馬逢秋
霜願言保修期歡樂應未央

恭祝張母王太夫人壽詩

海上鳳九羽庭前樹三珠方泉與園流所蓄應有殊我
友踵名胄伯仲同衾居微文成圭璋細行皆楷模在堂
有老母本是烏衣姝其弟正義公

夫人弟三元趾于甲
申之變自沈柳橋謚

正義 先生 湛身從靈胥 願頌辭秭歸 博謇慰女嬃 季子遠從

王季子張撈揭竿 荷戈走荒塗 未聞行絕袂 但見望倚

問從王蹈海死 只今孔巢子謂木弟南士也 猶結匡山廬 持畚偕隱淪 負米

為歡娛 南弧星當明 北陸景未徂 歲寒辨松高 風勁知

草枯 從來祝千春 但得誦九如 惟有母德宏 俯仰思踟

蹰

初入史館作

昭代重文治 翹車遞相因

聖教開中天皎若星日陳

詔令下郡國薦達如崔駰策對賜著作不止能親民所
念勝國史是非方未伸館錄既漸缺冊府亦已湮因命
合繩纂衆腋同補紉載事在集意辨誤需求真記疎陋
歐宋識弁諄向歆嘗恐大政略要使陳編新誰謂石室
藏便若海谷珍代易少忌諱辭一均見聞野稗過苛激
翻足傷人倫靖難詬聖祖易嗣憎忠臣幾有祕閣裁下
與穢史鄰生平負末學往欲追龍門何幸紹前修濫把

拙匠斤內府給筆札下使供柴薪當此委藉重敢不刪
述勤從來尙記善所做惟獲麟如何紊褒譏遺論徒干
春

蔡子伯庭前藝蘭忽一莖兩花過之有作

三陽扇融和百草盡疏布庭前有幽蘭輝輝總銜露一
苞發雙莖比莖坼兩跗翹然孤高姿團欒自相附初生
本空谷不與凡草伍芳蕤托櫨楹雅意重回互春風發
新榮階草展故素顧茲埤麗情相期詠修姱

二

猗猗庭前蘭日出汎景光沙石時有時湯茗沃已長誰
言擁孤標所見非同方至德必有隣草野應共藏古稱
君子佩不以幽不芳樹蕙既百畝牽蘿亦三湘相將得
儔侶勿道殊衆常不見蘭澤間新花滿東堂

答吳生

方泉蘊良玉園流產明珠藏弄既已深表見良獨殊跂
予薄蘭渚睠念菰城隅五湖際龍盤八彩看鳳雛文圃挺

珪壁德器揚璠璣于焉景遐標所在饒令譽違時變涼
燠溷俗忘哀愉懷哉進退艱徂矣歲月除碧葉被叢薄
彤雲轉林閭庭昏接新陰春豔還舊居高調不可和佳
步難為趨何當挹流波再繪雙鯉魚

西河集卷一百八十九

欽定四庫全書

西河集卷一百九十

翰林院檢討毛奇齡撰

五言三韻律

漫作

好古不搜隱，離居敢患貧。
憂愁損道德，思慮苦精神。
釋餌還垂釣，行歌以負薪。

扶南曲歌詞三首

瓊欄開寶瑟玉柱動金絲流臉迴羞際含頓送態時坐
遠聞聲細彈多入弄遲

嬌歌金屋裏妙舞玉堦前笛煖如含藥罇花似踏蓮春
風時度響夜月更流妍

試馬環俱墮凭箏袖有紋花陰齊却扇草短故翻裙後
苑饒行樂千秋奉聖君

答寄邗上劉雨峰遠貽

公幹膺時譽劉生受世知文傳豪士賦家近漢王陂貽

我雙瓊玉臨風解佩絲

攬勝高三楚興懷及九秋披襟揚子渡振筆大河流何
日尋劉表荆門駐桂舟

暫憇北幹村接得剡知勃安子構天章昭華龍
質并勃安令子書問悵然累日

避地懷終悔還鄉憇舊廬三年游子痛一紙故人書道
遠誰須友天涯尙念予

遙劄從誰寄探懷看復驚語多思宛轉感至記分明聞

道朱銓部于今返上京

答大敬

綠白不相宜寒匏苦自知
百年雙鳳羽三嘆五羊皮
只羨梁鴻案何須蘇氏辭

戲贈贅壻歸里

春雨絲絲落清江細細流
鹿車歸故里鵲羽度中洲
婦已工鞦韆人如解贅疣

客壻為家壻新姝即舊姝
岐陽驅呂尚稷下返淳于帶

笑遮紈扇攜兒見舅姑

九日

九日匡廬下征帆尚未開
但看青嶂立不見白衣來
兩年彭澤縣真負菊花枯

贈送吳明府

千室能為宰三年未有家
傾城來祖帳載石上仙槎歸
早須栽柳行遲正及瓜

詢王三雅禮消息不得

不見王生久傳聞又遠行兩過芳樂苑一上岳陽城懷
袖三年字烟波萬里情

五嶽游難到三亭使漸稀臨淮吾未去橫海爾安歸朝
露沾天下秋蓬捲地飛

旅寺

萬里江關客三秋祇樹林竿旌心極遠衣線淚融深日
晝朝陽影時聽晚磬音

即事

綠縷搓園柳紅裙擘井桃樓前迴馬勒池上理鴉毛隔
園山逾翠當杯興轉豪

東墅

東墅聽箏後南湖盪漿時荒園啼鳥雀高閣閉采蔥草
長尋春晚花深下日遲

寄南士白魚潭

春嶂開紅藥秋潭跳白魚人傳平子賦家受石公書何
日同相訪山陰道士廬

立秋夕

裁與嘆徂暑又復詠招商那得秋衣換空看露葉光晚
雲停乍薄夜氣坐生涼

新律移天道清颺度客闌河間星女煥林下暮蟬微自
恨同梧樹先驚一葉飛

漫興

且飲南鄰酒頻尋北壆歡山花猶晚發壚婦耐勤看夜
月來朝景秋風起歲寒

襍詩

古寺依山勝名園接水遙
野橋穿樹杪村女弄桑條
風定絲難墮江空日愈搖

游峭石山亭

峭石橫江口臨崖置草亭
大江來泛泛叢樹覆青青
鳥雀江邊噪烟雲亭下生

同諸公飲維揚劉孝廉宅

綠柳覆隋堤金尊泛竹西
屏深歌扇小語細燭枝
低人

是愁中遇詩從醉後題

聽薛婉絃索

不道雷塘夜還聽趙壁彈江高飛雨急衣動落星寒一撥三回住非因識曲難

七夕盼織女

天上佳期少人間別恨多一身長作客此夕枉臨河未許穿金線誰當停玉梭

隔歲投銀渚終宵望綵雲平橋烏鵲散故國女牛分何

日乘槎去天邊一問君

同徽之西美以重自湖寺晚歸過大聲園

湖近來幽訪城高上夕陽鳥聲春到雜人影暮歸長欲
過新營墅先停古道場

對酒偶成

寄友題書嬾看天作問遲新游多未識前事每經思不
耐聽歌後無如對酒時

將行示家人

莫謂將離遠相牽淚滿衣時違遺世晚貧久住家稀試
看庭前草年年上掩扉

小苑

小苑連山起平欄入水浮花低時觸帽藤蔓好維舟黃
鳥墻陰嘒紅筍座上留

蔡以敬處士郊園

桃李三年盛湖山一卧長種蔬逢好雨送客在殘陽何
日還鄰汝西郊舊草堂

西洲渡

吾愛西洲渡當壚候客程
橋門映水直釵柱壓花橫
春情問深淺波面綠痕生

重過清江訪施湖西宿石溪寺作

去歲去湖西清江草色齊
今來尋碧嶂江雨又淒淒
何事留江郡逡巡上石溪

祇為經年別難忘千載情
不因歸國緩豈是愛江清朝
雨隨人至春雲滿寺生

雨過春城暗雲深古寺開毛牲留榻處盧肇讀書臺山
色門邊起江聲城外來

西子

西子持紗女羅敷賣酒家衣紅因染茜足濕為澆花江
上商船繫門間闔扇斜

晚春郊行

綠水前溪漲丹花出郭稀柳邊門影靜日下雨絲飛村
店重沽酒山亭一換衣

同南士宿西資僧房

古寺清秋暮羈人共夜闌
杪櫛雙樹靜梵唄一聲寒
龍定開鐘鼓烏棲下井榦

重經弋陽山水

不盡江山好重經
歲序更萬山午雨歇
一路夏雲生豈有浮家戀
長隨估舶行

綠水灘仍漲青山黛自浮
新禽洲上出舊寺夢中游
一日重經意千秋萬載愁

八月十五夜懷人

涼夜靜無烟清宵一鏡圓
自推瑤海上長挂畫樓前
不共佳人望于今十五年

中秋夜真州望月懷張五客解州

涼月中秋好天涯一望愁
關山堆雪滿河海盪金流
何處同相憶真州與解州

觀競渡

每恨浮江日重看競渡時
數舟迎甲士兩岼走童兒
旆

影雲間起簫聲浪裏吹

棹發驚波遠龍過激水遙
記觀淮海渡似弄浙江潮
厭甚流華競悲哉樹錦標

斜日爭飛鷁清灘起和歌
樓官張席綺漿女濕衣羅
誰信三閭在中流喚奈何

山家

青山低北寨碧水到南庄
夜虎仙人杏春鳩帝女桑
村烟浮谷口林樹見潯陽

半卸頭效宮體詩

佳人最可憐，莫若半卸頭。
開函雙釧落，束髻一釵留。
紅裳嬌不卸，停燈憶遠遊。

半上頭

誰家小女子，半作上頭來。
髮短鬟猶束，鈿低額未開。
私問釵茸小，何得作重臺。

七言三韻律

西林橋畔

西林橋畔最堪思
石路參差接野祠
畫舫過時波似縠
油車散盡雨如絲
為送佳人渡湖去
曾來橋上立多時

題陳左軍別墅

幾曾射獵藍田外
但見樓船橫海回
偶倚水亭臨水曲
便栽花檻對花開
春深繫馬花間樹
日暮呼鷹水上臺

社

山村雨後動朝暉
山北山南有報祈
野老攜錢皆盡醉
嗟予割肉未懷歸
勾龍布穀祠前舞
新燕尋巢屋裏飛

送張杉赴晉州幕三首

張子西游秦晉間朔風吹雪度江關驛亭柳葉誰堪把
幕府蓮花爾自攀腰下羊頭三尺鞘近前雙紐是刀環
使君擁篲解梁州才子輕車汗漫游管記肯同阮瑀幕
依人還向仲宣樓計程傍臘過河水何日乘春下隴頭
鍼線密縫慈母意韋絃兩佩故人心長淮雪霽冰魚合
臨晉風多塞鳥深每欲下帷留郝子可堪倚馬送陳琳

九日登四望臺

北幹山頭野菊開，登高載酒且徘徊。
故鄉猶遇重陽日，新磴能通四望臺。
況自舊游人散後，十年不上此山來。

飲壚下作

流落天涯年復年，酒徒招我醉花前。
廬江小婦偏能美，洛下名姝實可憐。
吳寵人前歌碧玉，蕭叢臉際似紅蓮。
山陰余氏女，避兵南鄰就家母。
論諷陶潛詩，且出手書陶集相示母，以命姓。

曾與班姬較石渠，可憐避地到荒閭。
暫為老母高堂客，

偏愛淵明處士書翠帶紫幘抽綠草
臙脂畫字艷紅蕖

雨歇口吟

黃梅雨歇在村西
裁見晨光鳩復啼
江郭幾重林裏霧
柴門一線屐頭泥
春潮渡馬浮來濶
曉閣懷人望去迷

牆桃為東風所落

旅館緋桃似早霞
春風昨夜度來賒
起看枝上留殘蒂
最恨池西聚落花
布席不須開左幌
登牆空自戀東家

淮寓謝友人各餽淮酒

玉瓮銀缸慰客懷依然進食在天涯深慙屈子醒何用
但作劉伶死便埋終歲無家難去楚一朝有酒竟如淮

黃媛介入越感贈

漂泊明湖又一年寒花相對意茫然三秋病入蒹葭路
八口貧隨書畫船南國久無劉妹賦東征應有惠姬篇

重過楊橋

湘湖風起皺生潮十里平山一望遙坐趁涼風過湖曲
重隨枯柳卧楊橋紅亭東去人猶在白鷺西飛影未消

即事

龍岡南下大江隈一日江頭醉一回堤邊浣婦堆紅粉
竹裏村醅泛白醅貼水浮萍隨棹合中流野鴨近船迴

書亭壁二首

有序

縣城西十里永興道到江為縣人送行地曾于此送
二客不能忘今茲二十年後物改人非送亦匪舊屣
躬經行觸憶生感聊占小律書亭壁云爾

望京門外長亭路鎮海樓邊古驛臺
皎皎朝陽從地起

浮浮春色滿江來當年送客躊躇處無數桃花雨後開
城西舊有三清閣道上分排幾處祠遍地草花紅漫漫
參天楊柳碧絲絲曾來閣上凭欄久正是祠前送客時

與美人著棋代語二首

礮晶作子玉為盤直直橫橫仔細安纖指點來紅甲冷
清瞳溜落碧波寒袖長翻却重排易手快停將欲換難
明星朗朗布東廂就裏聰明無過娘珠串乍連懸作結
玉欄不斷打成墻沉吟慢理眉間粉懊惱將輸臂上璫

代美人答

粉豆紋楸解寂寥
眼清心格又條條
守玄便已知吾勝
失彩何妨乞汝饒
阿嫂蛇行猶有待
嗟君虎口不曾超

謝友赴揚州幕

水亭高瀉玉壺冰
六月逢君下廣陵
作賦參軍推鮑照
辟人太守有陳登
竹西歌吹應難歇
幕下圖書愧未能

孔渡驛寄虔州周使君三首

虔陽雲樹鬱蒼蒼
萬里秋風雁路長
重到臨川尋內史

每從南郡憶周郎去年曾在章江夜十八灘前再舉觴
聞君長向崆峒望我亦將尋嶺嶠來寒歲兩經安吉路
清秋一上鬱孤臺雖無蕙草江邊寄應見梅花郡裏開
篋中尙載燕都草川上遙看贛浦雲酤酒輒思紅舫醉
裁書猶有碧蒲紋願因孔渡知津吏寄與虔州賢使君

遇蕃仙采山堂作

何處秋風度桂枝王孫遲暮不勝悲可憐花院人逢日
正是亭臯葉下時嚴助上書須及早劉伶飲酒莫教遲

龍安嬌女曲二首

左家嬌女鎖金繩來拜龍安寺裏僧踏索誤翻銜食雀
隔牕驚聽撲紗蠅欲登鈴閣行還住羞入珠龕喚不應
嬌女初來禮佛牙額頭剪髮尙垂髻從瞻白象能銜菓
只問黃金好鑄花游人指顧爭相語云是墻東刺史家

壽張母

金鳳為冠霞作裾萱花五月北堂居自歸桓氏曾提甕
為念王孫只倚閭

時張宦游未歸

拜母可通雞黍約稱觴願獻

穀城書

泛艇

春風泛艇若耶西
細草繁花處處迷
近岼水牕紅榻小
滿墻村女綠鬟低
林邊獵火飛春犬
竹下炊烟唱午雞

小艇

小艇紅油一棹橫
平橋水滿綠紋生
樹歌不礙斜穿入
花底偏宜仰卧行
山館再停應有恨
鄰船一笑亦多情

丹旄詞二首

蕭蕭古樹落朝星
駟馬城西悲欲停
仙姥乘雲還昊闕
使君扶櫬到江亭
引將丹旆迴樊口
送去哀風滿洞庭
荒城松柏畫生陰
松下誰為丹旆吟
執紼行歌虞殯意
寨帷上道使君心
陳芻不盡川原草
却賻還辭暮夜金

九日登樓示王生

登樓何處送將歸
縹緲長帆帶落暉
對酒漫愁江樹遠
捲簾時訝塞鴻稀
偶同陶令探黃菊
最愛王家有白衣

奉贈華蓋山鄒尊師二首

清都仙觀華峰頭高峙金銀十二樓紫玉欄邊晞綠髮
碧桃花下卧青牛何年示我三門訣共向蓬山頂上遊
華蓋山人八寶冠紫霄宮府自盤桓虎衣嬌女彈金瑟
龍節仙官降石壇何年賜我盈箱藥使我乘風生羽翰
暫投湖墅吳氏園喜倪內史璠姚文學際恒對

酒卽席賦贈二首

高會正當湖墅曲良朝剛及暮秋天可憐張儉還鄉日
猶是黃公對酒年流水尚環佛閣後垂楊仍在市樓前

豈為博文思巨濟每因讀易想姚平游來不記亡三篋
老去何曾擁百城此際喜看行秘在相逢莫惜酒盃傾

六言詩

短歌行

井序

輾轉日復日日迫人遠修游之期難矣誰為為之

離丘蔓草生花南近溪流若耶吳宮美人東家曾過前
溪浣紗朝日陽春麗華相逢宛轉輕車可憐中道蹉跎
前溪日凋朱荷斜日秋風奈何誰為為之若何

破陣樂詞

商調
曲

漢兵西出蕭關十里旌旗蔽山列陣如雲既破分弓却
月能彎鎧虱自飛銀鎖介馬長銜鐵環金闕賢王欵入
玉門大將生還

僧舍除夕答沈倣見懷原韻

繞屋數竿修竹臨流幾樹梅花客程無限幽思僧舍依
然舊家栢枕暗浮綠醕蓮燈深罩紅紗且留今夕歡宴
安問明朝歲華

嶺外梅花未寄江南柳色將舒故園春信難到客裏殘
年又除鐘磬幽尋僧臘辛椒儼傍齋居憐君念我意氣
浩浩淮流勿如

行橫山過華嚴寺

溪北溪南佛寺山前山後人家望去千村紅樹行來一
片丹霞

湖上吟


西子湖頭盪滌陸公祠下當壚不是盧家少婦也勝青

溪小姑

雨後山桃舒萼風前堤柳垂條正月看將二月一橋行
過三橋

送客

梁父城邊走馬袁公浦口揚舲送君十里五里同上長
亭短亭



西河集卷一百九十